

# Da traffic, natira e la forza da l'ambient chasan

Ura da dumondas dal cussegl grond

■ **(anr/fa) Pliras deputadas e plirs deputads han fatg diever en l'emprima sessiun sunter las elecziuns da la pussaivladad da far dumondas a la regenza. Tranter auter è vegnida tematisada la via da Malögia.** La deputada Heidi Clalüna (pbd, Engiadin'Ota) ha dumandà il president da la regenza Mario Cavigelli infurmaziuns davart il traject da la via da Malögia tranter Segl Maria e Silvaplauna: «La via che maina lung la riva dal Lai da Silvaplauna ed è fermamain frequentada è en in stadi desolat. E malgrà il grond traffic vegn ella utilisada era da ciclists ch'avessan a disposiziun in'atgna via da velos», ha ella constatà e dumandà tge ch'il chantun prevesia da far en chausa. Cavigelli ha rendì attent a la problematica da la cuntrada dals lais d'Engiadin'Ota che fa part da l'inventari per cuntradas svizras degnas da vegnir protegidas.

## Project da l'UCB dal 2019 pront per l'exposiziun publica

«La regenza è conscianta da la problematica ch'exista sin quest traject surtut per il traffic plaun», ha ditg il manader dal departament da construcziun, traffic e selvicultura. Gia a la fin dals onns 1990 aveva l'Uffizi da construcziun bassa chantunal (UCB) preschentà a chantun e confederaziun ina proposta per schliar questa situaziun privlusa. «Causa la cuntrada protegida han quella giada dentant l'Uffizi federal per l'ambient e la Cumissiun federala per la protecciun da la natira e patria refusà quest project, schend che quel influenzeschia memia fitg la cuntrada dals lais», ha infurmà Cavigelli e ditg che l'UCB haja en il fratemp però fatg ulteriurs scleriments per chattar ina soluziun sin quest traject. Quel uffizi è actualmain londervi ad elavurar in project ch'è pront primavaira per vegnir



Per radund ina terza da las deputadas e dals deputads actuals en il cussegl grond èsi lur davosa sessiun.

FOTO O ITEM

expost publicamain. «Igl è previs da realisar en tuttas duas direzziuns vials per ils ciclists», ha il cusseglier guvernativ tradì. «Ins guarda dad evitar conflicts cun la cuntrada protegida.» Il cumenzament da la realisaziun da quest project vegn ad esser il pli baud l'onn 2021.

## Aziuns en tunnel dal San Bernardino senza problems da comunicaziun

Rodolfo Fasani (pcd, Mesocco) s'ha infurmà davart la situaziun cun il bus

ch'ha ars dacurt en il tunnel dal San Bernardino. El aveva udi che la coordinaziun tranter las organisaziuns da glisch blava nun haja funcziunà tschient per tschient. «Qua han giugà ina rolla forza problems linguistics tranter ils pumpiers da lingua taliana cun quels da lingua tudestga», ha el ditg. Cusseglier guvernativ Christian Rathgeb ha respu che pumpiers, ambulanzas e polizia han prestà ensemen cun l'UCB fitg buna lavur e ditg che questas aziuns vegnian analizadas actualmain da manie-

ra detagliada. «Gia uss pon ins constatar che la comunicaziun tranter ils partenaris ha funcziunà fitg bain, uschia ch'i na fa betg basegn d'agir en chausa.» A la dumonda da Fasani sch'i na fasschess betg basegn da stgaffir tranter Roveredo e San Bernardino causa la detg gronda distanza in'ulteriura basa d'ambulanza ha respu Rathgeb: «A l'avis da la regenza nun è quai necessari, dapi l'onn 2016 ha l'uffizi da sanadad concess al Servizio Ambulanza del Moesano ina contribuziun che al pussi-

bilitescha er en avegnir da manar las duas basas a Roveredo (24 uras al di) ed a Mesocco (durant il di).»

## PDGR examineschan avantatgs d'in tractament a chasa

Christina Bucher-Brini (ps, Cuira) ha menziunà las circa 90 000 personas che vegnian tractadas mintg'onn en Svizra en clinicas psichiatricas. «Tar bunamain la mesadad da quels cas na fasschess quai gnanc basegn, il tractament pudess era vegnir fatg a chasa», ha ditg la deputada. Ella ha declarà il concept numnà Home Treatment: «Enstagl ch'il pazient va en la clinica vegn la clinica tar il pazient.» Cun questa metoda lavuran ins en divers pajais, p. ex. Norvegia, Danemarc, Olanda u Australia. En Svizra datti per entant a Lucerna, Turitg, Argovia, Basilea e Genevra questa sort tractaments a chasa. «Ils resultats dals studis mussan che questa metoda scursanescha il temp da tractament, las influenzas socialas èn per ils pazients main grondas, els èn pli cuntents ed il tractament fa gist uschè bun effect sco tar ina dimora en clinica, sche betg anc meglier effect», ha constatà Bucher-Brini. Ella ha dumandà sch'il chantun Grischun na veglia lantschar in project pilot per introducir er qua il Home Treatment. Cusseglier guvernativ Christian Rathgeb ha confermà quai e ditg ch'ils Servetschs psichiatric grischuns (PDGR) ramassian durant ils proxims dus onns en la Val dal Rain grischuna experientschas cun il Home Treatment. «Sa basond sin quella experientschas è la regenza pronta d'incumbensar ils PDGR dad elavurar in concept per l'introducziun dal Home Treatment en Grischun», ha ditg Rathgeb ed agiunt ch'i vegnia ad esser necessari da sclerir la co-finanziament era da las assicuranzas da malsauns.